

Transkript sa konferencije za medije međunarodnih organizacija

OHR, Mario Brkić

OSCE, Aida Bešić

EUPM, Monja Koluder

EUFOR, Jem Thomas

OHR

Uspostavljen sistem za završetak posla na identifikaciji nestalih osoba

Više od 14.000 porodica u Bosni i Hercegovini još čeka na informacije o sudbini njihovih najmilijih koji su nestali u toku rata. Kao što je viši zamjenik visokog predstavnika, Martin Ney, izjavio na sesiji koja se danas održava, "ova brojka svjedoči o tome da odgovarajući organi nisu ispunili svoje obaveze koje su imali po Daytonu".

Ambasador Ney će predsjedavati današnjom sesijom radne grupe za nestale osobe, koja je osnovana pod okriljem Međunarodnog komiteta crvenog kriza sa ciljem prikupljanja i prenosa informacija o nestalim osobama od organa entiteta i Distrikta Brčko.

Aneks 7 Daytonskog sporazuma obavezuje nadležne organe da osiguraju ove informacije.

Ambasador Ney će također naglasiti da BiH sada ima zakonski okvir i potrebne domaće institucije za uspješan rad na pitanju nestalih osoba. Zakon o nestalim osobama je usvojen prošle godine, a Institut za nestale osobe je osnovan i očekuje se da počne sa radom prije naredne godine.

Nepoštivanje revizorskih izvještaja ugrožava proces tranzicije BiH

Također bih vam skrenuo pažnju na izjave koje je dao jučer Patrice Dreiski, šef Ekonomskog odjela OHR-a, na konferenciji održanoj u Sarajevu.

G-din Dreiski je naglasio da iako su državni i entitetski revizori počeli vršiti pozitivan uticaj na način raspolaganja javnim sredstvima u BiH i na način upravljanja javnim preduzećima, ovaj uticaj nije bio ni približno dovoljan.

“Bez obzira na skandaloznost ovih izvještaja – krađa, nekompetentnost, neadekvatno upravljanje – ogorčenje javnosti koje obično uslijedi nakon objavljivanja revizorskih izvještaja traje, čini se, svega nekoliko dana” rekao je on. “Nakon što se bura smiri, političari, direktori raznih odbora i ostali pripadnici tih krugova vraćaju se svome poslu kao da se ništa nije desilo”

G-din Dreiski je rekao da to što revizije, do sada, nisu uspjele da održe ogorčenje javnosti i unaprijede upravljanje vladinih odjeljenja i javnih preduzeća “predstavlja stvarnu opasnost za ekonomsku tranziciju BiH kao cjeline”.

On je istaknuo da je “do sada broj krivičnih prijava koje su rezultat revizorskih izvještaja neproporcionalno mali”, naglasivši činjenicu da je uloga javnog tužioca “da nastavi tamo gdje je revizor stao kada dođe do otkrivanja krivične aktivnosti”.

OSCE

Misija OSCE-a u BiH podržava studijsku posjetu Parlamentu Slovenije

Kao dio podrške razvoju istraživanja parlamentarnih kapaciteta Bosne i Hercegovine, Misija OSCE-a u BiH u razdoblju od 20. do 23. novembra 2005. godine organizirala je studijsku posjetu Parlamentu Slovenije za mlade članove Centra za parlamentarna istraživanja BiH.

Program obuke, koji je napravljen u saradnji sa Sektorom za istraživanje i dokumentiranje Narodne skupštine Slovenije fokusiran je na posebne zahtjeve parlamentarnog istraživanja i modernih istraživačkih tehnika. Za osnovu ima raniju saradnju i razmjenu znanja i iskustava između Parlamentarne skupštine BiH i Narodne skupštine Slovenije.

Misija OSCE-a u BiH nastaviti će sa davanjem svoje podrške ovoj saradnji i ubuduće jer je slovenačko iskustvo kao i znanje, veoma bitno za Parlamentarnu skupštinu BiH, s obzirom na težnje ove zemlje da se pridruži Evropskoj uniji.

EUPM

Nije bilo izjava.

EUFOR

Zaključci Vijeća o Zapadnom Balkanu

Na 2690. sastanku Vijeća za opće poslove održanom jučer u Briselu, Vijeće Evropske unije je razmatralo vojnu operaciju ALTHEA Evropske unije u Bosni i Hercegovini, nakon uspješnog okončanja prve godine mandata.

‘Vijeće pozdravlja pozitivan doprinos koji je operacija imala za sigurnost i stabilnost u Bosni i Hercegovini, te potvrđuje da je nastavak vojnog prisustva EU u ovoj fazi od izuzetnog značaja. Vijeće je zaključilo da je ova operacija praktični primjer strateškog partnerstva sa NATO-om u rješavanju kriza.

Vijeće je odobrilo preporuke Generalnog sekretara/Visokog predstavnika da se broj vojnika u narednoj godini značajnije ne mijenja, a da odluke o budućem brojnom stanju i strukturi EUFOR-a treba zasnivati na procjeni uvjeta na terenu. Vijeće je potvrdilo da EUFOR treba zadržati iste zadatke u narednih šest mjeseci. Održivi napredak u procesu stabilizacije i pridruživanja, te procjena uticaja izbora koji će biti održani 2006.g. će omogućiti ministrima da razmotre opcije budućeg prisustva EUFOR-a u Bosni i Hercegovini.'